

四庫全書

史部

欽定四庫全書

史記集解卷三十九

宋 裴駰 撰

史記三十九

晉世家第九

唐叔虞者周武王子而成王弟初武王與叔虞母會時

左傳曰邑姜方娠太叔服虔曰邑姜武王后齊太公女

夢天謂武王曰余命女生

子名虞余與之唐及生子文在其手曰虞故遂因命之

曰虞武王崩成王立唐有亂周公誅滅唐成王與叔虞
戲削桐葉為珪以與叔虞曰以此封若史佚因請擇曰
立叔虞成王曰吾與之戲耳史佚曰天子無戲言言則
史書之禮成之樂歌之於是遂封叔虞於唐唐在河汾

之東方百里故曰唐叔虞

世本曰居鄂宋忠
曰鄂地今在大夏

姓姬氏字

子于唐叔子燮是為晉侯晉侯子寧族是為武侯武侯
之子服人是為成侯成侯子福是為厲侯厲侯子宜白
是為靖侯靖侯以來年紀可推自唐叔至靖侯五世無

其年數靖侯十七年周厲王迷惑暴虐國人作亂厲王
出奔于彘大臣行政故曰共和十八年靖侯卒子釐侯
司徒立釐侯十四年周宣王初立十八年釐侯卒子獻
侯籍立獻侯十一年卒子穆侯費王立穆侯四年取齊
女姜氏為夫人七年伐條生太子仇杜預曰條晉地十年伐千
畝有功杜預曰西河界休縣南有地名千畝生少子名曰成師杜預曰意取能成其
衆晉人師服曰賈逵曰晉大夫異哉君之命子也太子曰仇仇
者讎也少子曰成師成師大號成之者又名自命也物

自定也今適庶名反逆此後晉其能毋亂乎二十七年
穆侯卒弟殤叔自立太子仇出奔殤叔三年周宣王崩
四年穆侯太子仇率其徒襲殤叔而立是為文侯文侯
十年周幽王無道犬戎殺幽王周東徙而秦襄公始列
為諸侯三十五年文侯仇卒子昭侯伯立昭侯元年封
文侯弟成師于曲沃曲沃邑大於翼翼晉君都邑也成
師封曲沃號為桓叔靖侯庶孫欒賓相桓叔桓叔是時
年五十八矣好德晉國之衆皆附焉君子曰晉之亂其

在曲沃矣未大於本而得民心不亂何待七年晉大臣
潘父弑其君昭侯而迎曲沃桓叔桓叔欲入晉晉人發
兵攻桓叔桓叔敗還歸曲沃晉人共立昭侯子平為君
是為孝侯誅潘父孝侯八年曲沃桓叔卒子緡代桓叔
是為曲沃莊伯孝侯十五年曲沃莊伯弑其君晉孝侯
子翼晉人攻曲沃莊伯莊伯復入曲沃晉人復立孝侯
子却為君是為鄂侯鄂侯二年魯隱公初立鄂侯六年
卒曲沃莊伯聞晉鄂侯卒乃興兵伐晉周平王使虢公

將兵伐曲沃莊伯莊伯走保曲沃晉人共立鄂侯子光

是為哀侯哀侯二年曲沃莊伯卒子稱代莊伯立是為

曲沃武公哀侯六年魯弑其君隱公哀侯八年晉侵陘

廷

賈逵曰翼南鄙邑名

陘廷與曲沃武公謀九年伐晉于汾旁虜

哀侯晉人乃立哀侯子小子為君是為小子侯

禮記曰天子未

除喪曰余小子生名之死亦名之鄭玄曰晉有小子侯是取之天子也

小子元年曲沃武

公使韓萬殺所虜晉哀侯

賈逵曰韓萬曲沃桓叔之子莊伯弟

曲沃益彊

晉無如之何晉小子之四年曲沃武公誘召晉小子殺

之周桓王使虢仲伐曲沃武公武公入於曲沃乃立晉
哀侯弟緡為晉侯晉侯緡四年宋執鄭祭仲而立突為
鄭君晉侯十九年齊人管至父弑其君襄公晉侯二十
八年齊桓公始霸曲沃武公伐晉侯緡滅之盡以其
寶器賂獻于周釐王釐王命曲沃武公為晉君列為諸
侯於是盡併晉地而有之曲沃武公已即位三十七年
矣更號曰晉武公晉武公始都晉國前即位曲沃通年
三十八年武公稱者先晉穆侯曾孫也曲沃桓叔孫也

桓叔者始封曲沃武公莊伯子也自桓叔初封曲沃以至武公滅晉也凡六十七歲而卒代晉為諸侯武公代晉二歲卒與曲沃通年即位凡三十九年而卒子獻公詭諸立獻公元年周惠王弟頤攻惠王惠王出奔居鄭之櫟邑五年伐驪戎得驪姬韋昭曰西戎之別在驪山也驪姬弟俱

愛幸之八年士蔿說公

賈逵曰士蔿晉大夫

曰故晉之羣公子多

不誅亂且起乃使盡殺諸公子而城聚都之

賈逵曰聚晉邑命

曰絳始都絳九年晉羣公子既亡奔號號以其故再伐

晉弗克十年晉欲伐虢士為曰且待其亂十二年驪姬

生奚齊獻公有意廢太子乃曰曲沃吾先祖宗廟所在

而蒲邊秦屈邊翟

韋昭曰蒲今蒲坂屈北屈皆在河東杜預曰蒲今平陽蒲子縣是也不

使諸子居之我懼焉於是使太子申生居曲沃公子重

耳居蒲公子夷吾居屈獻公與驪姬子奚齊居絳晉國

以此知太子不立也太子申生其母齊桓公女也曰齊

姜早死申生同母女弟為秦穆公夫人重耳母翟之狐

氏女也夷吾母重耳母女弟也獻公子八人而太子申

生重耳夷吾皆有賢行及得驪姬乃遠此三子十六年

晉獻公作二軍

左傳曰王使虢公命曲沃伯以一軍為晉侯今始為一軍

公將上軍

太子申生將下軍趙夙御戎畢萬為右伐滅霍滅魏滅

耿

服虔曰三國皆姬姓魏在晉之蒲坂河東也杜預曰平陽皮氏縣東南有耿鄉永安縣東北有霍太山也

還為太子城曲沃賜趙夙耿賜畢萬魏以為大夫士為

曰太子不得立矣分之都城

服虔曰臣有先君之主曰都

而位以卿

賈逵曰謂將下軍

先為之極

服虔曰言其祿位極盡于此

又安得立不如逃

之無使罪至為吳太伯不亦可乎

王肅曰太伯知天命在王季奔吳不反

猶有令名

王肅曰雖去猶可有令名何與其坐而及禍也

太子不從卜偃曰畢

萬之後必大

賈逵曰卜偃晉掌卜大夫郭偃

萬盈數也魏大名也

服虔曰數

從一至萬為滿魏巍高大也

以是始賞天開之矣

服虔曰以魏賞畢萬是為天開

其

福天子曰兆民諸侯曰萬民令名之大以從盈數其必

有衆

杜預曰以魏從萬有衆多之象

初畢萬卜仕於晉國遇屯之比

賈逵

曰震下坎上屯坤下坎上比屯初九變之比

辛廖占之曰吉

賈逵曰辛廖晉大夫

屯固

比入吉孰大焉

杜預曰屯險難也所以為堅固比親密所以得入

其後必蕃昌

十七年晉侯使太子申生伐東山

賈逵曰東山赤狄別種

里克諫

獻公

賈逵曰里克晉卿里季也

曰太子奉冢祀社稷之粢盛以朝夕

視君膳者也

服虔曰廚膳飲食

故曰冢子君行則守有守則從

服虔曰有代太子守則從之

從曰撫軍

杜虔曰助君撫循軍士

守曰監國古之

制也夫率師專行謀也

杜預曰率師者必專謀軍事

誓軍旅

杜預曰宣號令

君與國政之所圖也

賈逵曰國政正卿也

非太子之事也師在制

命而已

杜預曰命將軍所制

稟命則不威專命則不孝故君之嗣

適不可以帥師君失其官

杜預曰太子統帥是失其官

率師不威將

安用之

杜預曰專命則不孝是為師必不威也

公曰寡人有子未知其太

子誰立里克不對而退見太子太子曰吾其廢乎里克

曰太子勉之教以軍旅

賈逵曰將下軍

不共是懼何故廢乎且

子懼不孝毋懼不得立

服虔曰不得立已

修已而不責人則免

於難太子帥師公衣之偏衣

服虔曰偏聚之衣偏異色駁不純聚在中左右異故

曰偏衣杜預曰偏衣左右異色其半似公服韋昭曰偏半也分身之半以授太子

佩之金玦

服虔

曰以金為玦也韋昭曰金玦兵要也

里克謝病不從太子遂伐東山十九

年獻公曰始吾先君莊伯武公之誅晉亂而虢常助晉

伐我又匿晉亡公子果為亂弗誅後遺子孫憂乃使荀

息以屈產之乘

何休曰屈產出名馬之地乘備駟也

假道於虞虞假道遂

伐虢

賈逵曰虞在晉南虢在虞南

取其下陽以歸

服虔曰下夏陽虢邑在太陽東北三

十里穀梁傳曰下陽虞虢之塞邑

獻公私謂驪姬曰吾欲廢太子以奚

齊代之驪姬泣曰太子之立諸侯皆已知之而數將兵

百姓附之奈何以賤妾之故廢適立庶君必行之妾自

殺也驪姬詳譽太子而陰令人譖惡太子而欲立其子

二十一年驪姬謂太子曰君夢見齊姜太子速祭曲沃

服虔曰齊姜廟所在歸釐於君太子於是祭其母齊姜於曲沃上

其薦胙於獻公獻公時出獵置胙於宮中驪姬使人置毒藥胙中居二日獻公從獵來還宰人上胙獻公獻公

欲饗之驪姬從旁止之曰胙所從來遠宜試之祭地地

墳

韋昭曰將飲先祭示有先也墳起也

與犬犬死與小臣小臣死

韋昭曰小臣宦

名掌陰事今閹士也

驪姬泣曰太子何忍也其父而欲弑代之況

他人乎且君老矣旦暮之人曾不能待而欲弑之謂獻

公曰太子所以然者不過以妾及奚齊之故妾願子母

辟之他國若早自殺毋徒使母子為太子所魚肉也始

君欲廢之妾猶恨之至於今妾殊自失於此太子聞之

奔新城

韋昭曰新城曲沃也新為太子城

獻公怒乃誅其傅杜原款或

謂太子曰為此藥者乃驪姬也太子何不自辭明之太子曰吾君老矣非驪姬寢不安食不甘即辭之君且怒之不可或謂太子曰可奔他國太子曰被此惡名以出人誰內我我自殺耳十一月戊申申生自殺於新城此時重耳夷吾來朝人或告驪姬曰二公子怨驪姬譖殺太子驪姬恐因譖二公子申生之藥胙二公子知之二

子聞之恐重耳走蒲夷吾走屈保其城自備守初獻公使士為為二公子築蒲屈城弗就夷吾以告公公怒士為士為謝曰邊城少寇安用之退而歌曰狐裘蒙茸一國三公吾誰適從

服虔曰蒙茸以言亂貌三公言君與二公子將敵故不知所從

卒就

城及申生死二子亦歸保其城二十二年獻公怒二子不辭而去果有謀矣乃使兵伐蒲蒲人之宦者勃鞞命重耳促自殺重耳踰垣宦者追斬其衣袂

服虔曰袂袂也

重耳

遂奔翟使人伐屈屈城守不可下是歲也晉復假道於

虞以伐虢虞之大夫宮之奇諫虞君曰晉不可假道也

是且滅虞虞君曰晉我同姓不宜伐我宮之奇曰太伯

虞仲太王之子也太伯亡去是以不嗣虢仲虢叔王季

之子也為文王卿士其記勲在王室歲於盟府

杜預曰盟府司

盟之官也將虢是滅何愛于虞且虞之親能親於桓莊之族

乎桓莊之族何罪盡滅之虞之與虢脣之與齒脣亡則

齒寒虞公不聽遂許晉宮之奇以其族去虞其冬晉滅

虢虢公醜奔周

皇覽曰虢公冢在河內溫縣郭東濟水南大冢是也其城南有虢公臺還

襲滅虞虜虞公并其大夫并伯百里奚以媵秦穆公

杜預

曰穆姬獻公女送女曰媵以屈辱之

而修虞祀

服虔曰虞所祭祀命祀也

荀息牽曩

所遺虞屈產之乘馬奉之獻公笑曰馬則吾馬齒

亦老矣

公羊傳曰蓋戲之也何休曰以馬歲戲喻荀息之年老也

二十三年獻公遂

發賈華等伐屈

賈遠曰賈華晉右行大夫

屈潰夷吾將奔翟冀芮曰

不可

韋昭曰冀芮晉大夫

重耳已在矣今往晉必移兵伐翟翟畏

晉禍且及不如走梁梁近於秦秦彊吾君百歲後可以

求入馬遂奔梁二十五年晉伐翟翟以重耳故亦擊晉

於齧桑

左傳作采桑
服虔曰翟地

晉兵解而去當此時晉彊西有河

西與秦接境北邊翟東至河內驪姬弟生悼子二十六

年夏齊桓公大會諸侯於葵邱晉獻公病行後未至逢

周之宰孔宰孔曰齊桓公益驕不務德而務遠略諸侯

弗平君第毋會毋如晉何獻公亦病復還歸病甚乃謂

荀息曰吾以奚齊為後年少諸大臣不服恐亂起子能

立之乎荀息曰能獻公曰何以為驗對曰使死者復生

生者不慙為之驗於是遂屬奚齊於荀息荀息為相主

國政秋九月獻公卒里克邲鄭欲內重耳以三公子之

徒作亂

賈逵曰邲鄭晉大夫三公子申生重耳夷吾

謂荀息曰三怨將起秦晉輔

之子將何如荀息曰吾不可負先君言十月里克殺奚

齊于喪次獻公未葬也荀息將死之或曰不如立奚齊

弟悼子而傅之荀息立悼子而葬獻公十一月里克弑

悼子于朝

列女傳曰鞭殺驪姬于市

荀息死之君子曰詩所謂白珪

之玷猶可磨也斯言之玷不可為也

杜預曰詩大雅言此言之缺難治甚

於白珪

其荀息之謂乎不負其言初獻公將伐驪戎卜曰

齒牙為禍

韋昭曰齒牙謂兆端左右蒙折有似不齒牙中有縫畫以象讒言之為害也

及破驪

戎獲驪姬愛之竟以亂晉里克等已殺奚齊悼子使人

迎公子重耳於翟欲立之重耳謝曰負父之命出奔父

死不得修人子之禮侍喪重耳何敢入大夫其更立他

子還報里克里克使迎夷吾於梁夷吾欲往呂省卻芮

曰內猶有公子可立者而外求難信計非之秦輔彊國

之威以入恐危乃使卻芮賂秦約曰即得入請以晉河

西之地與秦乃遺里克書曰誠得立請遂封子於汾陽

之邑

賈逵曰汾水名汾陽晉地也

秦繆公乃發兵送夷吾于晉齊桓

公聞晉內亂亦率諸侯如晉秦兵與夷吾亦至晉齊乃使隰朋會秦俱入夷吾立為晉君是為惠公齊桓公至晉之高梁而還歸惠公夷吾元年使邳鄭謝秦曰始夷吾以河西地許君今幸得入立大臣曰地者先君之地君亡在外何以得擅許秦者寡人爭之弗能得故謝秦亦不與里克汾陽邑而奪之權四月周襄王使周公忌父賈逵曰周卿士會齊秦大夫共禮晉惠公惠公以重耳在外

畏里克為變賜里克死謂曰微里子寡人不得立雖然

子亦殺二君一大夫

服虔曰奚齊悼子荀息也

為子君者不亦難乎

里克對曰不有所廢君何以興欲誅之其無辭乎乃言

為此臣聞命矣遂伏劍而死於是邳鄭使謝秦未還故

不及難晉君改葬恭太子申生

韋昭曰獻公時申生葬不如禮故改葬之

秋

狐突之下國

服虔曰晉所滅國以為下邑一曰曲沃有宗廟故謂之下在絳下故曰下國也

遇

申生申生與載而告之

杜預曰忽如夢而相見狐突本為申生御故復使登車

曰

夷吾無禮余得請於帝

服虔曰帝天帝請罰有罪

將以晉與秦秦將

祀余孤突對曰臣聞神不食非其宗君其祀毋乃絕乎

君其圖之申生曰諾吾將復請帝後十日

左傳曰七日

新城

西偏將有巫者見我焉

杜預曰將因巫以見

許之遂不見

杜預曰狐突許

其言申生之象亦沒

及期而往復見申生告之曰帝許罰有罪矣

弊於韓

賈逵曰弊敗也韓晉韓原

兒乃謠曰恭太子更葬矣後十四

年晉亦不昌昌乃在兄邲鄭使秦聞里克誅乃說秦繆

公曰呂省卻稱冀芮實為不從

杜預曰三子晉大夫不從不與秦賂也

若重

賂與謀出晉君入重耳事必就秦繆公許之使人與歸

報晉厚賂三子三子曰幣厚言甘此必邳鄭賣我於秦

遂殺邳鄭及里克邳鄭之黨七與大夫

韋昭曰七與申生下軍之衆大

夫也杜預曰侯伯七命副車七乘

邳鄭子豹奔秦言伐晉繆公弗聽惠

公之立倍秦地及里克誅七與大夫國人不附二年周

使召公過

韋昭曰召武公為王卿士

禮晉惠公惠公禮倨召公譏之

四年晉饑乞糴於秦繆公問百里奚

服虔曰秦大夫

百里奚曰

天菑流行國家代有救菑恤鄰國之道也與之邳鄭子

豹曰伐之繆公曰其君是惡其民何罪卒與粟自雍屬

絳五年秦饑請糴於晉晉君謀之慶鄭曰

杜預曰慶以鄭晉大夫

秦得立已而倍其地約晉饑而秦貸我今秦饑請糴與

之何疑而謀之號射曰

服虔曰號射惠公舅

往年天以晉賜秦秦

弗知取而貸我今天以秦賜晉晉其可以逆天乎遂伐

之惠公用號射謀不與秦粟而發兵且伐秦秦大怒亦

發兵伐晉六年春秦繆公將兵伐晉晉惠公謂慶鄭曰

秦師深矣

韋昭曰深入境一曰深尤重

奈何鄭曰秦內君君倍其賂

晉饑秦輸粟秦饑而晉倍之乃欲因其饑伐之其深不

亦宜乎晉卜御右慶鄭皆吉公曰鄭不孫

服虔曰孫順

乃更

令步陽御戎家僕徒為右

服虔曰二子晉大夫也

進兵九月壬戌

秦繆公晉惠公合戰韓原惠公馬驚不行秦兵至公窘

召慶鄭為御鄭曰不用卜敗不亦當乎遂去更令梁繇

靡御號射為右輅秦繆公

服虔曰輅迎也

繆公壯士冒敗晉軍

晉軍敗遂失秦繆公反獲晉公以歸秦將以祀上帝繆

君姊為繆公夫人哀經涕泣公曰得晉侯將以為樂今

乃如此且吾聞箕子見唐叔之初封曰其後必當大矣

晉庸可滅乎乃與晉侯盟王城

杜預曰馮翊臨晉縣東有王城

而許之

歸晉侯亦使呂省等報國人曰孤雖得歸毋面目見社稷卜日立子圉晉人聞之皆哭秦繆公聞呂省晉國和乎對曰不和小人懼失君亡親不憚立子圉曰必報讐寧事戎狄其君子則愛君而知罪以待秦命曰必報德有此二故不和於是秦繆公更舍晉惠公餽之七年十一月歸晉侯晉侯至國誅慶鄭修政教謀曰重耳在外諸侯多利內之欲使人殺重耳於狄重耳聞之如齊八

年使太子圉質秦初惠公亡在梁梁伯以其女妻之生

一男一女梁伯卜之男為人臣女為人妾故名男為圉

女為妾

服虔曰圉人掌養馬臣之賤者不聘曰妾

十年秦滅梁梁伯好土功

治城溝

賈逵曰溝塹也

民力罷怨其衆數相驚曰秦寇至民恐

惑秦竟滅之十三年晉惠公病內有數子太子圉曰吾

母家在梁梁今秦滅之我外輕於秦而內無援於國君

即不起病大夫輕更立他公子乃謀與其妻俱亡歸秦

女曰子一國太子辱在此秦使婢子侍

服虔曰曲禮曰世婦以下自稱

婢子婢子婦人之卑稱

以固子之心子亡矣我不從子亦不敢言

子圉遂亡歸晉十四年九月惠公卒太子圉立是為懷公子圉之亡秦怨之乃求公子重耳欲內之子圉之立畏秦之伐也乃令國中諸從重耳亡者與期期盡不到者盡滅其家狐突之子毛及偃從重耳在秦弗肯召懷公怒囚狐突突曰臣子事重耳有年數矣今召之是教之反君也何以教之懷公卒殺狐突秦繆公乃發兵送內重耳使人告欒郤之黨為內應殺懷公於高梁入

重耳重耳立是為文公晉文公重耳晉獻公之子也自少好士年十七有賢士五人曰趙衰狐偃咎犯文公舅也賈佗先軫魏武子自獻公為太子時重耳固已成人矣獻公即位重耳年二十一獻公十三年以驪姬故重耳備蒲城守秦獻公二十一年獻公殺太子申生驪姬讒之恐不辭獻公而守蒲城獻公二十二年獻公使宦者履鞮趣殺重耳重耳踰垣宦者遂斬其衣袪重耳遂奔狄狄其母國也是時重耳年四十三從此五士其

餘不名者數十人至狄狄伐咎如

賈逵曰赤狄之別隗姓

得二女

以長女妻重耳生伯儵叔劉以少女妻趙衰生盾居狄
五歲而晉獻公卒里克已殺奚齊悼子乃使人迎欲立
重耳重耳畏殺因固謝不敢入已而晉更迎其弟夷吾
立之是為惠公惠公七年畏重耳乃使宦者履鞮與壯
士欲殺重耳重耳聞之乃謀趙衰等曰始吾奔狄非以
為可用與以近易通故且休足休足久矣固願從之大
國夫齊桓公好善志在霸王收恤諸侯今聞管仲隰朋

死此亦得賢佐盍往乎於是遂行重耳謂其妻曰待我
二十五年不來乃嫁其妻笑曰犂二十五年吾冢上柏
大矣雖然妾待子重耳居狄凡十二年而去過衛衛文
公不禮去過五鹿

賈逵曰衛地杜預曰今衛縣西北有
地名五鹿平陽元城縣東亦有五鹿

飢而從野人乞食野人盛土器中進之重耳怒趙衰曰土
者有土也君其拜受之至齊齊桓公厚禮而以宗女妻
之有馬二十乘重耳安之重耳至齊二歲而桓公卒會
豎刁等為內亂齊孝公之立諸侯兵數至留齊凡五歲

重耳愛齊女毋去心趙衰咎犯乃於桑下謀行齊女侍

者在桑上聞之以告其主其主乃殺侍者

服虔曰懼孝公怒故殺之

以滅口

勸重耳趣行重耳曰人生安樂孰知其他必死於

此徐廣曰一云人生一世必死於此

不能去齊女曰子一國公子窮而

來此數士者以子為命子不疾反國報勞臣而懷女德

竊為子羞之且不求何時得功乃與趙衰等謀醉重耳

載以行行遠而覺重耳大怒引戈欲殺咎犯咎犯曰殺

臣成子偃之願也重耳曰事不成我食舅氏之肉咎犯

曰事不成犯肉腥臊何足食乃止遂行過曹曹共公不
禮欲觀重耳駢脇曹大夫釐負羈曰晉公子賢又同姓
窮來過我奈何不禮共公不從其謀負羈乃私遺重耳
食置璧其下重耳受其食還其璧去過宋宋襄公新困
兵於楚傷於泓聞重耳賢乃以國禮禮於重耳宋司馬
公孫固善於咎犯曰宋小國新困不足以求入更之大
國乃去過鄭鄭文公弗禮鄭叔詹諫其君曰晉公子賢
而其從者皆國相且又同姓鄭之出自厲王而晉之出

自武王鄭君曰諸侯亡公子過此者衆安可盡禮叔瞻
曰君不禮不如殺之且後為國患鄭君不聽重耳去之
楚楚成王以適諸侯禮待之重耳謝不敢當趙衰曰子
亡在外十餘年小國輕子況大國乎今楚大國而固過
子子其毋讓此天開子也遂以客禮見之成王厚遇重
耳重耳甚卑成王曰子即反國何以報寡人重耳曰羽
毛齒角玉帛君王所餘未知所以報王曰雖然何以報
不穀重耳曰即不得已與君王以兵車會平原廣澤請

辟王三舍

賈逵曰司馬法從避不過三舍三舍九十里也

楚將子玉怒曰王遇

晉公子至厚今重耳言不孫請殺之武王曰晉公子賢而困於外久從者皆國器此天所置庸可殺乎且言何以易之居楚數月而晉太子圉亡秦秦怨之聞重耳在楚乃召之成王曰楚遠更數國乃至晉秦晉接境秦君賢子其勉行厚送重耳重耳至秦繆公以宗女五人妻重耳故子圉妻與往重耳不欲受司空季子

服虔曰晉臣曰

季

也曰其國且伐況其故妻乎且受以結秦親而求入子

乃拘小禮忘大醜乎遂受繆公大歡與重耳飲趙衰歌

黍苗詩

韋昭曰詩云芄芄
黍苗陰雨膏之

繆公曰知子欲急反國矣趙

衰與重耳下再拜曰孤臣之仰君如百穀之望時雨是

時晉惠公十四年秋惠公以九月卒子圉立十一月葬

惠公十二月晉國大夫欒卻等聞重耳在秦皆陰來勸

重耳趙衰等反國為內應甚衆於是秦繆公乃發兵與

重耳歸晉晉聞秦兵來亦發兵拒之然皆陰知公子重

耳入也唯惠公之故貴臣呂卻之屬不欲立重耳重耳

出亡凡十九歲而得入時年六十二矣晉人多附焉文
公元年春秦送重耳至河咎犯曰臣從君周旋天下過
亦多矣臣猶知之況於君乎請從此去矣重耳曰若反
國所不與子犯共者河伯視之乃投璧河中以與子犯
盟是時介子推從在船中乃笑曰天實開公子而子犯
以為己功而要市於君固足羞也吾不忍與同位乃自
隱渡河秦兵圍令狐晉軍于廬柳韋昭曰廬柳晉地也二月辛丑
咎犯與秦晉大夫盟於郕杜預曰解縣西北有郕城壬寅重耳入於

晉師丙午入於曲沃丁未朝于武宮

賈逵曰文公之祖武公廟也 即

位為晉君是為文公羣臣皆往懷公圍奔高梁戊申使人殺懷公懷公故大臣呂省卻芮本不附文公文公立恐誅乃欲與其徒謀燒公宮殺文公文公不知始嘗欲殺文公宦者履鞮知其謀欲以告文公解前罪求見文公文公不見使人讓曰蒲城之事女斬予祛其後我從狄君獵女為惠公來求我我惠公與女期三日至而女一日至何速也女具念之宦者曰臣乃鋸之餘不敢以

二心事君倍主故得罪於君君已反國其毋蒲翟乎且
管仲射鉤桓公以霸今刑餘之人以事告而君不見禍
又且及矣於是見之遂以呂卻等告文公文公欲召呂
卻呂卻等黨多文公恐初入國國人賣已乃為微行會
秦繆公於王城國人莫知三月己丑呂卻等果反焚公
宮不得文公文公之衛徒與戰呂卻等引兵欲奔秦繆
公誘呂卻等殺之河上晉國復而文公得歸夏迎夫人
於秦秦所與文公妻者卒為夫人秦送三千人為衛以

備晉亂文公修政施惠百姓賞從亡者及功臣大者封
邑小者尊爵未盡行賞周襄王以弟帶難出居鄭地來
告急晉晉初定欲發兵恐他亂起是以賞從亡未至隱
者介子推推亦不言祿祿亦不及推曰獻公子九人唯
君在矣惠懷無親外內棄之天未絕晉必將有主主晉
祀者非君而誰天實開之二三子以為己力不亦誣乎
竊人之財猶曰是盜況貪天之功以為己力乎下冒其
罪上賞其姦上下相蒙

服虔曰
蒙欺也

難與處矣其母曰盍亦

求之以死誰懟推曰尤而效之罪有甚焉且出怨言不食其祿母曰亦使知之若何對曰言身之文也身欲隱安用文之文之是求顯也其母曰能如此乎與女偕隱至死不復見介子推從者憐之乃懸書宮門曰龍欲上天五蛇為輔龍已升雲四蛇各入其宇一蛇獨怨終不見處所文公出見其書曰此介子推也吾方憂王室未圖其功使人召之則亡遂求所在聞其入綿上山中

賈逵

曰綿上晉地杜預曰西河介休縣南有地名綿上

於是文公環綿上山中而封

之以為介推田

徐廣曰一作國

號曰介山以記吾過且旌善人

賈逵曰旌表也

從亡賤臣壺叔曰君三行賞賞不及臣敢請罪

文公報曰夫導我以仁義防我以德惠此受上賞輔我以行卒以成立此受次賞矢石之難汗馬之勞此復受次賞若以力事我而無補吾缺者此受次賞三賞之後故且及子晉人聞之皆說二年春秦軍河上將入王趙衰曰求霸莫如入王尊周周晉同姓晉不先入王後秦入之毋以令于天下方今尊王晉之資也三月甲辰晉

乃發兵至陽樊

服虔曰陽樊周地陽邑名也樊仲山之所居故曰陽樊

圍溫入襄

王於周四月殺王弟帶周襄王賜晉河內陽樊之地四

年楚成王及諸侯圍宋宋公孫固如晉告急先軫曰報

施定霸於今在矣

杜預曰報宋贈馬之施

狐偃曰楚新得曹而初

婚於衛若伐曹衛楚必救之則宋免矣於是晉作三軍

王肅曰始復成國之禮半周軍也

趙衰舉卻縠將中軍卻臻佐之使狐

偃將上軍狐毛佐之命趙衰為卿欒枝將下軍

賈逵曰欒枝欒

賓之孫

先軫佐之荀林父御戎魏犢為右往伐冬十二月

晉兵先下山東而以原封趙衰

杜預曰河內沁水縣西北有原城

五年

春晉文公欲伐曹假道於衛衛人弗許還自河南度侵

曹伐衛正月取五鹿二月晉侯齊侯盟于斂孟

杜預曰衛地也

衛侯請盟晉晉人不許衛侯欲與楚國人不欲故出其

君以說晉衛侯居襄牛

服虔曰衛地也

公子買守衛楚救衛不

卒

徐廣曰一作勝

晉侯圍曹三月丙午晉師入曹數之以其不

用釐負羈言而用美女乘軒者三百人也令軍毋入僖

負羈宗家以報德楚圍宋宋復告急晉文公欲救則攻

楚為楚嘗有德不欲伐也欲釋宋宋又嘗有德於晉惠之先軫曰執曹伯分曹衛地以與宋楚急曹衛其勢宜釋宋於是文公從之而楚成王乃引兵歸楚將子玉曰王遇晉至厚今知楚急曹衛而故伐之是輕王王曰晉侯在外十九年困日久矣果得反國險阨盡知之能用其民天之所開不可當子玉請曰非敢必有功願以間執讒慝之口也

服虔曰子玉非敢求有大功但欲執為賈讒慝之口謂子玉過三百乘不能入

也杜預曰執猶塞也楚王怒少與之兵於是子玉使宛春告晉

賈逵

曰宛春楚大夫請復衛侯而封曹臣亦釋宋咎犯曰子玉無禮

矣君取一臣取二勿許韋昭曰君文公也臣子玉也先

軫曰定人之謂禮楚一言定三國子一言而亡之我則

毋禮不許楚是棄宋也不如私許曹衛以誘之執宛春

以怒楚韋昭曰怒楚令必戰既戰而後圖之杜預曰須勝晉侯乃

囚宛春於衛且私許復曹衛曹衛告絕於楚楚得臣怒

得臣即子玉擊晉師晉師退軍吏曰為何退文公曰昔我楚

約退三舍可倍乎楚師欲去得臣不肯四月戊辰宋公

齊將秦將與晉侯次城濮

賈逵曰衛地也

已巳與楚兵合戰楚

兵敗得臣收餘兵去甲午晉師還至衡雍

杜預曰衡雍鄭地今滎陽

卷縣

作王宮于踐土

服虔曰既敗楚師襄王自往臨踐土賜命晉侯晉侯聞而為之作宮

初鄭助楚楚敗懼使人請盟晉侯晉侯與鄭伯盟五月

丁未獻楚俘於周駟介百乘徒兵千

服虔曰駟介駟馬被甲也徒兵步卒

也

天子使王子虎命晉侯為伯

賈逵曰王子虎周大夫

賜大輅彤

弓矢百張弓矢千

賈逵曰大輅金輅彤弓赤張弓黑也諸侯賜弓矢然後征伐

鉅鬯

一卣珪瓚

賈逵曰鉅黑黍鬯香酒也所以降神卣器名諸侯賜珪瓚然後為鬯

虎賁三百

人賈逵曰天子卒曰虎賁

晉侯三辭然後稽首受之

賈逵曰稽首首至地周

作晉文侯命王若曰父義和

孔安國曰同姓故稱曰父馬融曰王順曰父能以義

和我

不顯文武能慎明德

孔安國曰文王武王能詳慎顯用明德

昭登於

上布聞在下

馬融曰昭明也上謂天下謂地

維時上帝集厥命於文武

孔安國曰惟以是故集

恤朕身繼予一人永其在位

孔安

國曰當憂念我身則我一人長安在位

於是晉文公稱伯癸亥王子虎盟

諸侯於王庭

服虔曰王庭踐土也

晉焚楚軍火數日不息文公歎

左右曰勝楚而君猶憂文公曰吾聞能戰勝安者唯聖

人是以懼且子玉猶在庸可喜乎子玉之敗而歸楚成
王怒其不用其言貪與晉戰讓責子玉子玉自殺晉文
公曰我擊其外楚誅其內內外相應於是乃喜六月晉
人復入衛侯壬午晉侯渡河北歸國行賞狐偃為首或
曰城濮之事先軫之謀文公曰城濮之事偃說我毋失
信先軫曰軍事勝為右吾用之以勝然此一時之說偃
言萬世之功奈何以一時之利而加萬世功乎是以先
之冬晉侯會諸侯于溫欲率之朝周力未能恐其有畔

者乃使人言天王狩於河陽壬申遂率諸侯朝王於踐
土孔子讀史記至文公曰諸侯無召王王狩河陽者春
秋諱之也丁丑諸侯圍許曹伯臣或說晉侯曰齊桓公
合諸侯而國異姓今君為會而滅同姓曹叔振鐸之後
晉唐叔之後合諸侯而滅兄弟非禮晉侯說復曹伯於
是晉始作三行服虔曰辟天子六軍故謂之三行荀林父將中行先穀
將右行先蔑將左行杜預曰三行無佐疑大夫帥也七年晉文公秦穆
公共圍鄭以其無禮於文公亡過時及城濮時鄭助楚

也圍鄭欲得叔瞻叔瞻聞之自殺鄭持叔瞻告晉晉曰
必得鄭君而甘心焉鄭恐乃間令使謂秦穆公曰亡鄭
厚晉於晉得矣而秦未為利君何不解鄭得為東道交
秦伯說罷兵晉亦罷兵九年冬晉文公卒子襄公歡立
是歲鄭伯亦卒鄭人或賣其國於秦秦穆公發兵往襲
鄭十二月秦兵過我郊襄公元年春秦師過周無禮王
孫滿譏之兵至滑鄭賈人弦高將市于周遇之以十二
牛勞秦師秦師驚而還滅滑而去晉先軫曰秦伯不用

襄叔反其衆心此可擊欒枝曰未報先君施於秦擊之

不可先軫曰秦侮吾孤伐吾同姓何德之報遂擊之襄

公墨衰

經賈逵曰墨變凶杜預曰以凶服從戎故墨之

四月敗秦師于殽虜

秦三將孟明視西乞弼白乙丙以歸遂墨以葬文公

服虔

曰非禮也杜預曰記禮所由變也

文公夫人秦女謂襄公曰秦欲得其

三將戮之公許遣之先軫聞之謂襄公曰患生矣軫乃

追秦將秦將渡河已在船中頓首謝卒不反後三年秦

果使孟明伐晉報殽之敗取晉汪以歸四年秦繆公大

興兵伐我渡河取王官封殽尸而去晉恐不敢出遂城

守五年晉伐秦取新城

服虔曰秦邑新所作城也

報王官役也六年

趙衰成子欒貞子咎季子犯霍伯皆卒

賈逵曰欒貞子欒枝也霍伯先

且居也

趙盾代趙衰執政七年八月襄公卒太子夷臯少

晉人以難故

服虔曰晉國數有患難

欲立長君趙盾曰立襄公弟

雍好善而長先君愛之且近於秦秦故好也立善則固

事長則順奉愛則孝結舊好則安賈季曰不如其弟欒

辰羸嬖於二君

服虔曰辰羸懷嬴也二君懷公文公

立其子民必安之趙

盾曰長羸賤班在九人下

服虔曰班次也

其子何震之有

賈逵曰震

威

也且為二君嬖淫也為先君子不能求大而出在小國

僻也母淫子僻無威陳小而遠無援將何可乎使士會

如秦迎公子雍賈季亦使人召公子樂於陳趙盾廢賈

季以其殺陽處父

案左傳曰此時賈他為太師陽處父為太傅

十月葬襄公

十一月賈季奔翟是歲秦繆公亦卒靈公元年四月秦

康公曰昔文公之入也無衛故有呂卻之患乃多與公

子雍衛太子母繆嬴日夜抱太子以號泣於朝曰先君

何罪其嗣亦何罪舍適而外求君將安置此

服虔曰此太子出

朝則抱以適趙盾所頓首曰先君奉此子而屬之子曰

此子材吾受其賜不材吾怨子

王肅曰怨其教導不至

今君卒言

猶在耳

杜預曰在宣子之耳

而棄之若何趙盾與諸大夫皆患穆

嬴且畏誅乃背所迎而立太子夷臯是為靈公發兵以

距秦送公子雍者趙盾為將往擊秦敗之令狐先蔑隨

會亡奔秦秋齊宋衛鄭曹許君皆會趙盾盟于扈

杜預曰鄭

地滎陽卷縣西北有扈亭

以靈公初立故也四年伐秦取少梁秦亦

取晉之郤

徐廣曰年表曰北徵也

六年秦康公伐晉取羈馬晉侯

怒使趙盾趙穿卻缺擊秦大戰河曲趙穿最有功七年

晉六卿患隨會之在秦常為晉亂乃詳令魏壽餘反晉

降秦秦使隨會之魏因執會以歸晉八年周頃王崩公

卿爭權故不赴晉使趙盾以車八百乘平周亂而立匡

王是年楚莊王初即位十二年齊人弑其君懿公十四

年靈公壯侈厚斂以雕墻

賈逵曰彫畫也

從臺上彈人觀其避

丸也宰夫胾熊蹯不熟

服虔曰蹯熊掌其肉難熟

靈公怒殺宰夫使

婦人持其屍出棄之過朝趙盾隨會前數諫不聽已又見死人手二人前諫隨會先諫不聽靈公患之使鉏麇

刺趙盾

賈逵曰鉏麇晉力士

盾閨門開居處節鉏麇退歎曰殺忠

臣棄君命罪一也遂觸樹而死

杜預曰趙盾庭樹也

初盾嘗田首

山

徐廣曰蒲坂縣有雷首山

見桑下有餓人餓人示眯明也盾與之

食食其半問其故曰宦三年

服虔曰宦官學仕也

未知母之存不

願遺母盾義之益與之飯肉已而為晉宰夫趙盾弗復

知也九月晉靈公飲趙盾酒伏甲將攻盾公宰示眯明

知之恐盾醉不能起而進曰君賜臣觴三行可以罷欲

以去趙盾令先母及難盾既去靈公伏士未會先縱齧

狗名敖

何休曰犬四尺曰敖

明為盾搏殺狗盾曰棄人用狗雖猛

何為然不知明之為陰德也已而靈公縱伏士出逐趙

盾示眯明反擊靈公之伏士伏士不能進而竟脫盾盾

問其故曰我桑下餓人問其名弗告

服虔曰不望報

明亦因亡

去盾遂奔未出晉境乙丑盾昆弟將軍趙穿襲殺靈公

於桃園

虞翻曰國名也

而迎趙盾趙盾素貴得民和靈公少侈

民不附故為弑易盾復位晉太史董狐書曰趙盾弑其君以視於朝盾曰弑者趙穿我無罪太史曰子為正卿而亡不出境反不誅國亂非子而誰孔子聞之曰董狐

古之良史也書法不隱

杜預曰不隱盾之罪

宣子良大夫也為法

受惡

服虔曰聞義則服杜預曰善其為法受屈也

惜也出疆乃免

杜預曰越境則君臣

之義絕可以不討賊也

趙盾使趙穿迎襄公弟黑臀于周而立之

是為成公成公者文公少子其母周女也壬申朝于武

宮成公元年賜趙氏為公族

服虔曰公族大夫也

伐鄭鄭倍晉故

也三年鄭伯初立附晉而棄楚楚怒伐鄭晉往救之六年伐秦虜秦將赤七年成公與楚莊王爭彊會諸侯于扈陳畏楚不會晉使中行桓子伐陳因救鄭與楚戰敗楚師是年成公卒子景公據立景公元年春陳大夫夏徵舒弑其君靈公二年楚莊王伐陳誅徵舒三年楚莊王圍鄭鄭告急晉晉使荀林父將中軍隨會將上軍趙朔將下軍卻克欒書先穀韓厥鞏朔佐之六月至河聞楚已服鄭鄭伯肉袒與盟而去荀林父欲還先穀曰凡

來救鄭不至不可將率離心卒度河楚已服鄭欲飲馬于河為名而去楚與晉軍大戰鄭新附楚畏之反助楚攻晉晉軍敗走河爭度船中人指甚衆楚虜我將智瑩歸而林父曰臣為督將軍敗當誅請死景公欲許之隨會曰昔文公之與楚戰城濮成王歸殺子玉而文公乃喜今楚已敗我師又誅其將是助楚殺仇也乃止四年先穀以首計而敗晉軍河上恐誅乃奔翟與翟謀伐晉晉覺乃族穀穀先軫子也五年伐鄭為助楚故也是時

楚莊王彊以挫晉兵河上也六年楚伐宋宋來告急晉

晉欲救之伯宗謀曰

賈逵曰伯宗晉大夫

楚天方開之不可當乃

使解楊紿為救宋

服虔曰解楊晉大夫

鄭人執與楚楚厚賜使反

其言令宋急下解楊紿許之卒致晉君言楚欲殺之或

諫乃歸解楊七年晉使隨會滅赤狄八年使郤克於齊齊

景公母從樓上觀而笑之所以然者郤克僂而魯使蹇

衛使眇故齊亦令人如之以尊客郤克怒歸至河上曰

不報齊者河伯視之至國請君欲伐齊景公問知其故

曰子之怨安足以煩國弗聽魏文子請老休辟卻克克執政九年楚莊王卒晉伐齊齊使太子彊為質於晉晉兵罷十一年春齊伐魯取隆魯告急衛衛與魯皆因卻克告急於晉晉乃使卻克欒書韓厥以兵車八百乘與魯衛共伐齊夏與頃公戰於鞏傷困頃公頃公乃與其右易位下取飲以得脫去齊師敗走晉追北至齊頃公獻寶器以求平不聽卻克曰必得蕭桐姪子為質齊使曰蕭桐姪子頃公母頃公母猶晉君母奈何必得之

不義請復戰晉乃許與平而去楚申公巫臣盜夏姬以

奔晉晉以巫臣為邢大夫

賈逵曰邢晉邑

十二年冬齊頃公如

晉欲上尊晉景公為王景公讓不敢晉始作六卿

賈逵曰初

作六卿
僭王也

韓厥鞏朔趙穿荀騅趙括趙旃皆為卿智瑩自

楚歸十三年魯成公朝晉晉弗敬魯怒去倍晉晉伐鄭

取汜十四年梁山崩

公羊傳曰梁山河上山杜預曰在馮翊夏陽北也

問伯宗

伯宗以為不足怪也

徐廣曰年表曰伯宗隱其人用其言

十六年楚將子

反怨巫臣滅其族巫臣怒遺子反書曰必令子罷於奔

命乃請使吳令其子為吳行人教吳乘車用兵吳晉始
通約伐楚十七年誅趙同趙括族滅之韓厥曰趙衰趙
盾之功豈可忘乎奈何絕祀乃復令趙庶子武為趙後
復與之邑十九年夏景公病立其太子壽曼為君是為
厲公後月餘景公卒厲公元年初立欲和諸侯與秦桓
公夾河而盟歸而秦倍盟與翟謀伐晉三年使呂相讓
秦賈逵曰呂相晉大夫因與諸侯伐秦至涇敗秦於麻隧虜其將
成差五年三郤讒伯宗殺之賈逵曰三郤郤錡郤犇郤至伯宗以好

直諫得此禍國人以是不附厲公六年春鄭倍晉與楚
盟晉怒欒書曰不可以當吾世而失諸侯乃發兵厲公
自將五月渡河聞楚兵來救范文子請公欲還卻至曰
發兵誅逆見疆辟之無以令諸侯遂與戰癸巳射中楚
共王目楚兵敗於鄢徐廣曰陵服虔曰鄢陵鄭
一作焉之東南地也子反收
餘兵拊循欲復戰晉患之共王召子反其侍者豎陽穀
進酒子反醉不能見王怒讓子反子反死王遂引兵歸
晉由此威諸侯欲以令天下求霸厲公多外嬖姬歸欲

盡去羣大夫而立諸姬兄弟寵姬兄曰胥童嘗與郤至

有怨及欒書又怨郤至不用其計而遂敗楚

左傳曰欒書欲待楚

師退而擊之郤至云楚有六間不可失也

乃使人間謝楚楚來詐厲公曰鄆

陵之戰實至召楚欲作亂內子周立之會與國不俱是

以事不成厲公告欒書欒書曰其殆有矣願公試使人

之周

虞翻曰周京師

微考之果使郤至於周欒書又使公子周

見郤至郤至不知見賣也厲公驗之信然遂怨郤至欲

殺之八年厲公獵與姬飲郤至殺豕奉進宦者奪之郤

至射殺宦者公怒曰季子欺予

杜預曰公反以爲邵至奪豕也

將誅三

邵未發也邵錡欲攻公曰我雖死公亦病矣邵至曰信

不反君智不害民勇不作亂失此三者誰與我我死耳

十二月壬午公令胥童以兵八百人襲攻殺三邵胥童

因以劫樂書中行偃于朝曰不殺二子患必及公公曰

一旦殺三卿寡人不忍益也對曰人將忍君

杜預曰人謂書偃

公弗聽謝樂書等以誅邵氏罪大夫復位二子頓首曰

幸甚幸甚公使胥童爲卿閏月乙卯厲公游匠驪氏

賈逵

曰匠驪氏晉外嬖大夫在翼者

樂書中行偃以其黨襲捕厲公囚之殺

胥童而使人迎公子周

徐廣曰一作糾

于周而立之是為悼公

悼公元年正月庚申樂書中行偃弑厲公葬之

左傳曰葬之于

翼東門之外

以一乘車

杜預曰言不以君禮葬也諸侯葬車七乘

厲公囚六日死

死十日庚午智瑩迎公子周來至絳刑雞與大夫盟而

立之是為悼公辛巳朝武宮二月乙酉即位悼公周者

其大父捷晉襄公少子也不得立號為桓叔桓叔最愛

桓叔生惠伯談談生悼公周周之立年十四矣悼公曰

大父父皆不得立而辟難於周客死焉寡人自以疎遠
毋幾為君今大夫不忘文襄之意而惠立桓叔之後賴
宗廟大夫之靈得奉晉祀豈敢不戰戰乎大夫其亦助
寡人於是逐不臣者七人修舊功施德惠收文公入時
功臣後秋伐鄭鄭師敗遂至陳三年晉會諸侯悼公問
羣臣可用者祁奚舉解狐解狐奚之仇復問舉其子祁
午君子曰祁奚可謂不黨矣外舉不避仇內舉不隱子
方會諸侯悼公弟楊干亂行

賈逵曰
行陳也

魏絳戮其僕

賈逵曰僕

御也悼公怒或諫公公卒賢絳任之政使和戎戎大親附

十一年悼公曰自吾用魏絳九合諸侯

服虔曰九合一謂會于戚二會

城棣救陳三會于鄆四會于邢丘五同盟于戲六會于祖七戍鄭虎牢八同盟于亳城北九會于蕭魚和

戎翟魏子之力也賜之樂三讓乃受之冬秦取我櫟十

四年晉使六卿率諸侯伐秦度涇大敗秦軍至棫林而

去十五年悼公問治國於師曠師曠曰唯仁義為本冬

悼公卒子平公彪立平公元年伐齊齊靈公與戰靡下

徐廣曰靡一作歷齊師敗走晏嬰曰君亦毋勇何不止戰遂去

晉追遂圍臨菑盡燒屠其郭中東至膠南至沂齊皆城
守晉乃引兵歸六年魯襄公朝晉晉欒逞有罪奔齊八
年齊莊公微遣欒逞於曲沃以兵隨之齊兵上太行欒
逞從曲沃中反襲入絳絳不戒平公欲自殺范獻子止
公以其徒擊逞逞敗走曲沃曲沃攻逞逞死遂滅欒氏
宗逞者欒書孫也左傳逞作盈其入絳與魏氏謀齊莊公聞
逞敗乃還取晉之朝歌去以報臨菑之役也十年齊崔
杼弑其君莊公晉因齊亂伐敗齊於高唐去報太行之

役也十四年吳延陵季子來使與趙文子韓宣子魏獻子語曰晉國之政卒歸此三家矣十九年齊使晏嬰如晉與叔嚮語叔嚮曰晉季世也公厚賦為臺池而不恤政政在私門其可久乎晏子然之二十二年伐燕二十六年平公卒子昭公夷立昭公六年卒六卿強公室卑子頃公去疾立頃公六年周景王崩王子爭立晉六卿平王室亂立敬王九年魯季氏逐其君昭公昭公居乾侯十一年衛宋使使請晉納魯君季平子私賂范獻子

獻子受之乃謂晉君曰季氏無罪不果入魯君十二年
晉之宗家祁奚孫叔嚮子相惡於君六卿欲弱公室乃
遂以法盡滅其族而分其邑為十縣各令其子為大夫
晉益弱六卿皆大十四年頃公卒子定公午立定公十
一年魯陽虎奔晉趙鞅簡子舍之十二年孔子相魯十
五年趙鞅使邯鄲大夫午不信欲殺午午與中行寅范
吉射親攻趙鞅鞅走保晉陽定公圍晉陽荀櫟韓不信
魏侈與范中行為仇乃移兵伐范中行范中行反晉君

擊之敗范中行范中行走朝歌保之韓魏為趙鞅謝晉

君乃赦趙鞅復位二十二年晉敗范中行氏二子奔齊

三十年定公與吳王夫差會黃池爭長趙鞅時從卒長

吳

徐廣曰吳世家說黃池之盟云趙鞅怒將戰吳乃長
晉定公左氏傳云乃先晉人外傳云吳公先歆晉公

次三十一年齊田常弑其君簡公而立簡公弟驁為平

公三十三年孔子卒三十七年定公卒子出公鑿立出

公十七年

徐廣曰年表云出公立
十八年或云二十年

智伯與趙韓魏共分

范中行地以為邑出公怒告齊魯欲以伐四卿四卿恐

遂反攻出公出公奔齊道死故知伯乃立昭公曾孫驕
為晉君是為哀公哀公大父雍晉昭公少子也號為戴

子

徐廣曰世本作桓
子雍注云戴子


戴子生忌忌善知伯早死故知伯

欲盡并晉未敢乃立忌子驕為君當是時晉國政皆決
智伯晉哀公不得有所制智伯遂有范中行地最彊哀
公四年趙襄子韓康子魏桓子共殺知伯盡并其地十
八年哀公卒子幽公柳立幽公之時晉畏反朝韓趙魏
之君獨有絳曲沃餘皆入三晉十五年魏文侯初立十

八年幽公淫婦人夜竊出邑中盜殺幽公魏文侯以兵誅晉亂立幽公子止是為烈公烈公十九年周威烈王賜趙韓魏皆命為諸侯二十七年烈公卒子孝公頎立孝公九年魏武侯初立襲邯鄲不勝而去十七年孝公卒子靜公俱酒立是歲齊威王元年也靜公二年魏武侯韓哀侯趙敬侯滅晉後而三分其地靜公遷為家人晉絕不祀

太史公曰晉文公古所謂明君也亡居外十九年至國

約及即位而行賞尚忘介子推沉驕主乎靈公既弑其
後成景致嚴至厲太刻大夫懼誅禍作悼公以後日衰
六卿專權故君道之御其臣下固不易哉



史記集解卷三十九

欽定四庫全書

史部

史記集解卷

四十三

詳校官侍讀學士_臣陸伯煊

洗馬_臣王坦修覆勘

總校官檢討_臣何思鈞

校對官待詔_臣胡士震

謄錄監生_臣黃其榮

欽定四庫全書

史記集解卷四十

宋 裴駰 撰

史記四十

楚世家第十

楚之先祖出自帝顓頊高陽高陽者黃帝之孫昌意之

子也高陽生稱稱生卷章卷章生重黎

徐廣曰世本云老童生重黎及

吳國維周曰老童即卷章

重黎為帝嚳高辛居火正甚有功能光融

天下帝嚳命曰祝融

虞翻曰祝大融明也韋昭曰祝始也

共工氏作亂帝

嚳使重黎誅之而不盡帝乃以庚寅日誅重黎而以其

弟吳回為重黎後復居火正為祝融吳回生陸終陸終

生子六人坼剖而產焉

于寶曰先儒學士多疑此事譙允南通才達學精核數理者也

作古史考以為作者妄記廢而不論余亦尤其生之異也然案六子之世子孫有國升降六代數千年間迭至霸王天將興之必有尤物乎若夫前志所傳修己背坼而生禹簡狄胸剖而生契歷代久遠莫足相證近魏黃初五年汝南屈雍妻王氏生男兒從右腋下出而平和自若數月創合母子無恙斯蓋近事之信也

今況古固知注記者之不妥也天地云為陰陽變化安可守之一端槩以常理乎詩云不坼不副無災無害原

詩人之旨明古之婦人嘗有圻副而產者其長一曰昆

矣又有因產而遇災害者故美其無害也

吾虞翻曰昆吾名樊為已姓封

二曰參胡

世本曰參胡者韓是也

三曰彭祖

虞翻曰名翦為彭姓封於大彭世本曰彭祖者彭城是也

四曰會人

世本日會

人者鄭是也

五曰曹姓

世本日曹姓者邾是也

六曰季連芊姓楚其後

也昆吾氏夏之時嘗為侯伯桀之時湯滅之彭祖氏殷

之時嘗為侯伯殷之末世滅彭祖氏季連生附沮

孫檢曰一

作祖附沮生穴熊其後中微或在中國或在蠻夷弗能紀

其世周文王之時季連之苗裔曰鬻熊鬻熊子事文王

早卒其子曰熊麗熊麗生熊狂熊狂生熊繹熊繹當周成王之時舉文武勤勞之後嗣而封熊繹於楚蠻封以

子男之田姓芊氏居丹陽

徐廣曰在南郡枝江縣

楚子熊繹與魯

公伯禽衛康叔子牟晉侯燮齊太公子呂伋俱事成王

熊繹生熊艾熊艾生熊黜熊黜生熊勝熊勝以弟熊楊

為後熊楊生熊渠熊渠生子三人當周夷王之時王室

微諸侯或不朝相伐熊渠甚得江漢間民和乃興兵伐

庸揚粵

杜預曰庸今上庸縣

至于鄂熊渠曰我蠻夷也不與中國

之號謚乃立其長子康為句亶王

張瑩曰今江陵也

中子紅為

鄂王

九州記曰鄂今武昌也

少子執疵為越章王皆在江上楚蠻

之地及周厲王之時暴虐熊渠畏其伐楚亦去其王後

為熊母康

徐廣曰即渠之長子

母康早死熊渠卒子熊摯紅立摯

紅卒其弟弒而代立曰熊延熊延生熊勇熊勇六年而周

人作亂攻厲王厲王出奔薳熊勇十年卒弟熊嚴為後

熊嚴十年卒有子四人長子伯霜中子仲雪次子叔堪

少子季徇熊嚴卒長子伯霜代立是為熊霜熊霜元年

周宣王初立熊霜六年卒三弟爭立仲雪死叔堪亡避

難於濮

杜預曰建寧郡南有濮夷

而少弟季徇立是為熊徇熊徇十

六年鄭桓公初封於鄭二十二年熊徇卒子熊罈立熊

罈九年卒子熊儀立是為若敖若敖二十年周幽王為

犬戎所弑周東徙而秦襄公始列為諸侯二十七年若

敖卒子熊坎立是為霄敖霄敖六年卒子熊眀立

徐廣曰眀

音舜是為蚡冒蚡冒十三年晉始亂以曲沃之故蚡冒十

七年卒蚡冒弟熊通弑蚡冒子而代立是為楚武王武

王十七年晉之曲沃莊伯弑主國晉孝侯十九年鄭伯弟段作亂二十一年鄭侵天子之田二十三年衛弑其君桓公二十九年魯弑其君隱公三十一年宋太宰華

督弑其君殤公三十五年楚伐隨

賈逵曰隨姬姓也杜預曰隨國今義陽隨縣隨

曰我無罪楚曰我蠻夷也今諸侯皆為叛相侵或相殺我有敝甲欲以觀中國之政請王室尊吾號隨人為之周請尊楚王室不聽還報楚三十七年楚熊通怒曰吾先鬻熊文王之師也早終成王舉我先公乃以子男田

令居楚蠻夷皆率服而王不加位我自尊耳乃自立為
武王與隨人盟而去於是始開濮地而有之五十一年

周召隨侯數以立楚為王楚怒以隨背已伐隨武王卒

師中而兵罷

皇覽曰楚武王冢在汝南郡桐陽縣葛陵鄉城東北民謂之楚王岑漢永平中葛陵

城北祝里社下於土中得銅鼎而名曰楚武王由是知楚武王之冢民傳言秦項赤眉之時欲發之輒頽壞填

壓不得發也

子文王熊貲立始都郢文王二年伐申過鄧鄧

人曰楚王易取鄧侯不許也

服虔曰鄧曼姓

六年伐蔡虜蔡哀

侯以歸已而釋之楚彊陵江漢間小國小國皆畏之十

一年齊桓公始霸楚亦始大十二年伐鄧滅之十三年卒

子熊羆立

史記音隱云羆古艱字

是為杜敖杜敖五年欲殺其弟

熊惲惲奔隨與隨襲弑杜敖代立是為成王成王惲元
年初即位布德施惠結舊好於諸侯使人獻天子天子
賜胙曰鎮爾南方夷越之亂無侵中國於是楚地千里
十六年齊桓公以兵侵楚至陘山楚成王使將軍屈完
以兵禦之與桓公盟桓公數以周之賦不入王室楚許
之乃去十八年成王以兵北伐許

地理志曰潁川許昌縣故許國也

君肉袒謝乃釋之二十二年伐黃二十六年滅英

徐廣曰年

表及他本皆作英一本作黃

三十三年宋襄公欲為盟會召楚楚王

怒曰召我我將好往襲辱之遂行至孟遂執辱宋公已而歸之三十四年鄭文公南朝楚楚成王北伐宋敗之泓射傷宋襄公襄公遂病創死三十五年晉公子重耳過成王以諸侯客禮饗而厚送之於秦三十九年魯僖公來請兵以伐齊楚使申侯將兵伐齊取穀

杜預曰濟北穀城縣

置齊桓公子雍焉齊桓公七子皆奔楚楚盡以為上大

夫滅夔夔不祀祝融鬻熊故也

服虔曰夔楚熊渠之孫熊摯之後夔在巫山之

陽秭歸鄉是也

夏伐宋宋告急於晉晉救宋成王罷歸將軍子

王請戰成王曰重耳亡在外久卒得反國天之所開不可當子玉固請乃與之少師而去晉果敗子玉於城濮成王怒誅子玉四十六年初成王將以商臣為太子語令尹子上子上曰君之齒未也

杜預曰齒年也言尚少

而又多內

寵絀乃亂也楚國之舉常在少者

賈逵曰舉立也

且商臣蠶目

而豺聲忍人也

服虔曰言忍為不義

不可立也王不聽立之後又

欲立子職

賈逵曰職商臣庶弟也

而紂太子商臣商臣聞而未審

也告其傅潘崇曰何以得其實崇曰饗王之寵姬

姬當作妹

江芊而勿敬也商臣從之江芊怒曰宜乎王之欲殺若

而立職也商臣告潘崇曰信矣崇曰能事之乎

服虔曰若立職

子能

事之曰不能能亡去乎曰不能能行大事乎

服虔曰謂弑君曰

能冬十月商臣以宮衛兵圍成王成王請食熊蹯而死

杜預曰熊掌難熟冀久將有外救之也

不聽丁未成王自絞殺商臣代立

是為穆王穆王立以其太子宫予潘崇使為太師掌國

事穆王三年滅江

杜預曰江國在汝南安陽縣

四年滅六蓼六蓼皐

陶之後

杜預曰六國今廬江六安豐蓼縣

八年伐陳十二年卒子

莊王侶立莊王即位三年不出號令日夜為樂令國中

曰有敢諫者死無赦伍舉入諫莊王左抱鄭姬右抱越

女坐鍾鼓之間伍舉曰願有進隱

隱謂隱藏其意

曰有鳥在於

皐三年不蜚不鳴是何鳥也莊王曰三年不蜚蜚則冲

天三年不鳴鳴則驚人舉退矣吾知之矣居數月淫益

甚大夫蘇從乃入諫王曰若不聞令乎對曰殺身以明

君臣之願也於是乃罷淫樂聽政所誅者數百人所進

者數百人任伍舉蘇從以政國人大說是歲滅庸六年

伐宋獲五百乘八年伐陸渾戎服虔曰陸渾戎在洛西也遂至洛觀

兵於周郊服虔曰觀兵陳兵於周也周定王使王孫滿勞楚王服虔曰以

郊勞禮迎之也楚王問鼎大小輕重杜預曰示欲偪周取天下對曰在德不

在鼎莊王曰子無阻九鼎楚國折鉤之喙足以為九鼎

王孫滿曰嗚呼君王其忘之乎昔虞夏之盛遠方皆至

貢金九牧服虔曰使九州之牧貢金鑄鼎象物賈逵曰象所圖物著之於鼎百物

而為之備使民知神姦

杜預曰圖鬼神百物之形使民逆備之也

桀有亂德

鼎遷於殷載祀六百

賈逵曰載辭也祀年也商曰祀王肅曰載祀者猶言年也

殷紂

暴虐鼎遷於周德之休明雖小必重

杜預曰不可遷

其姦回昏亂

雖大必輕

杜預曰言可移

昔成王定鼎于郊

杜預曰郊鄆今河南也河南縣

西有郊鄆陌武王遷之成王定之

卜世三十卜年七百天所命也周德

雖衰天命未改鼎之輕重未可問也楚王乃歸九年相

若敖氏

左傳曰子越

人或讒之王恐誅反攻王王擊滅若敖

氏之族十三年滅舒

杜預曰廬江六縣東有舒城也

十六年伐陳殺夏

徵舒徵舒弑其君故誅之也已破陳即縣之羣臣皆賀
申叔時使齊來不賀王問對曰鄙語曰牽牛徑人田
主取其牛徑者則不直矣取之牛不亦甚乎且王以陳
之亂而率諸侯伐之以義伐之而貪其縣亦何以復令
於天下莊王乃復國陳後十七年春楚莊王圍鄭三月
克之入自皇門賈逵曰鄭城門何休曰郭門也鄭伯肉袒牽羊以逆賈逵
曰肉袒牽羊示服為臣隸也曰孤不天不能事君君用懷怒以及敝
邑孤之罪也敢不唯命是聽賓之南海若以臣妾賜諸

侯亦唯命是聽若君不忘厲宣桓武

杜預曰周厲王宣王鄭之所自出也

鄭武公桓公始封之賢君也

不絕其社稷使改事君孤之願也非所

敢望也敢布腹心楚羣臣曰王勿許莊王曰其君能下

人必能信用其民庸可絕乎莊王自手旗左右麾軍引

兵去三十里而舍遂許之平

杜預曰退一舍而禮鄭

潘尫入盟子

良出質

潘尫楚大夫子良鄭伯弟

夏六月晉救鄭與楚戰大敗晉師

河上遂至衡雍而歸二十年圍宋以殺楚使也圍宋五

月城中食盡易于而食析骨而炊宋華元出告以情莊

王曰君子哉遂罷兵去二十三年莊王卒子共王審立
共王十六年晉伐鄭鄭告急共王救鄭與晉兵戰鄢陵
晉敗楚射中共王目共王召將軍子反子反嗜酒從者
豎陽穀進酒醉王怒射殺子反遂罷兵歸三十一年共
王卒子康王招立康王立十五年卒子負立是為鄭釁
康王寵弟公子圍徐廣曰史記多作回子比子皙棄疾鄭釁三年
以其季父康王弟公子圍為令尹主兵事四年圍使鄭
道聞王疾而還十二月己酉圍入問王疾絞而弑之

荀卿

曰以冠纓紱之左傳曰
葬王于郊謂之郊教

遂殺其子莫及平夏使使赴於

鄭伍舉問曰誰為後

服虔曰問來赴者

對曰寡大夫圍伍舉更

曰共王之子圍為長

杜預曰伍舉更赴辭使從禮告終稱嗣不以篡弑赴諸侯

子比

奔晉而圍立是為靈王靈王三年六月楚使使告晉欲

會諸侯諸侯皆會楚于申伍舉曰昔夏啓有鈞臺之饗

杜預曰河南陽翟縣南有鈞臺陂

商湯有景亳之命周武王有盟津之

誓成王有岐陽之蒐

賈逵曰岐山之陽

康王有豐宮之朝

服虔曰豐

宮成王廟所在也杜預曰豐在始平郭縣東有靈臺康王於是朝諸侯

穆王有塗山之會

齊桓有召陵之師晉文有踐土之盟君其何用靈王曰

用桓公

杜預曰用會名陵之禮也

時鄭子產在焉於是晉宋魯衛不

往靈王已盟有驕色伍舉曰桀為有仍之會有緡叛之

賈逵曰仍緡國名也

紂為黎山之會東夷叛之

服虔曰黎東夷國名也子姓

幽

王為太室之盟戎翟叛之

杜預曰太室中嶽也

君其慎終七月楚

以諸侯兵伐吳圍朱方八月克之囚慶封滅其族以封

徇曰無效齊慶封弑其君而弱其孤以盟諸大夫

杜預曰齊

崔杼弑其君慶封其黨故以弑君罪責之也

封反曰莫如楚共王庶子圍弑

其君兄之子負而代之立

穀梁傳曰軍人衆然皆笑

於是靈王使棄

疾殺之七年就章華臺

杜預曰南郡華容縣有臺在城內

下令內亡人

實之八年使公子棄疾將兵滅陳十年召蔡侯醉而殺

之使棄疾定蔡因為陳蔡公十一年伐徐以恐吳

左傳曰使

蕩侯等圍徐

靈王次于乾谿以待之王曰齊晉魯衛其封皆

受寶器我獨不今吾使使周求鼎以為分其予我乎

服虔

曰有功德受分器

析父對曰其予君王哉

賈逵曰析父楚大夫

昔我先王

熊繹辟在荆山篳路藍簣

徐廣曰篳一作暴駟案服虔曰篳路柴車素木輅也藍簣

言衣敝壞其
萋藍藍然也

以處草莽跋涉山林

服虔曰草行曰
跋水行曰涉

以事

天子唯是桃弧棘矢以共王事

服虔曰桃弧棘矢所以
禦其災言楚地山林無

所出

齊王舅也

服虔曰齊呂
伋成王之舅

晉及魯衛王母弟也楚是

以無分而彼皆有周今與四國服事君王將唯命是從

豈敢愛鼎靈王曰昔我皇祖伯父昆吾舊許是宅

服虔
曰陸

終氏六子長曰昆吾少曰季連季連楚之祖故謂
昆吾為伯父也昆吾曾居許地故曰舊許是宅

今鄭

人貪其田不我予今我求之其予我乎對曰周不愛鼎

鄭安敢愛田靈王曰昔諸侯遠我而畏晉今吾大城陳

蔡不羹

韋昭曰二國楚別都也潁川定陵有東不羹襄城有西不羹

賦皆千乘諸侯

畏我乎對曰畏哉靈王喜曰析父善言古事焉十二年春楚靈王樂乾谿不能去也國人苦役初靈王會兵于申僂越大夫常壽過殺蔡大夫觀起起子從亡在吳乃勸吳王伐楚為間越大夫常壽過而作亂為吳間使矯公子棄疾命召公子比於晉至蔡與吳越兵欲襲蔡令公子比見棄疾與盟于鄧

杜預曰潁川鄧陵縣西有鄧城

遂入殺靈王

太子祿立子比為王公子子皙為令尹棄疾為司馬先

除王宮觀從從師于乾谿令楚衆曰國有王矣先歸復
爵邑田室後者遷之楚衆皆潰去靈王而歸靈王聞太
子祿之死也自投車下而曰人之愛子亦如是乎侍者
曰甚是王曰余殺人之子多矣能無及此乎右尹曰左傳

曰右尹
子革

請待於郊以聽國人

服虔曰聽國
人欲為誰

王曰衆怒不

可犯曰且入大縣而乞師於諸侯王曰皆叛矣又曰且
奔諸侯以聽大國之慮王曰大福不再祇取辱耳於是
王乘舟將入于鄢

服虔曰鄢楚別都也
杜預曰襄陽宜城縣

右尹度王不用

其計懼俱死亦去王亡靈王於是獨傍徨山中野人莫

敢入王王行遇其故媼人

韋昭曰今之中涓

謂曰為我求食我

已不食三日矣媼人曰新王下法有敢饒王從王者罪
及三族且又無所得食王因枕其股而臥媼人又以土自
代逃去王覺而弗見遂飢不能起辛尹申無宇之子申

亥曰吾父再犯王命

服虔曰斷王旌執人於章臺之宮

王弗誅恩孰大

焉乃求王遇王飢於釐澤奉之以歸夏五月癸丑王死
申亥家申亥以二女從死并葬之是時楚國雖已立比

為王畏靈王復來又不聞靈王死故觀從謂初王比曰
不殺棄疾雖得國猶受禍王曰予不忍從曰人將忍王
王不聽乃去棄疾歸國人每夜驚曰靈王入矣乙卯夜
棄疾使船人從江上走呼曰靈王至矣國人愈驚又使
曼成然告初王比及令尹子皙曰王至矣國人將殺君
司馬將至矣杜預曰司馬謂棄疾君蚤自圖無取辱焉衆怒如水
火不可救也初王及子皙遂自殺丙辰棄疾即位為王
改名熊居是為平王平王以詐弑兩王而自立恐國人

及諸侯叛之乃施惠百姓復陳蔡之地而立其後如故

歸鄭之侵地存恤國中修政教吳以楚亂故獲五率以

歸

服虔曰五率蕩侯潘子
司馬督驅尹午陵尹喜

平王謂觀從恣爾所欲欲為

卜尹王許之

賈逵曰卜尹
卜師大夫官

初共王有寵子五人無適立

乃望祭羣神請神決之使主社稷而陰與巴姬

賈逵曰
共王妾

埋璧於室內召五子齋而入康王跨之

服虔曰兩足各
跨壁一邊杜預

曰過
其上

靈王肘加之子比子皙皆遠之平王幼抱而入再

拜壓紐故康王以長立至其子失之圍為靈王及身而

弑子比為王十餘日子皙不得立又俱誅四子皆絕無

後唯獨棄疾後立為平王竟續楚祀如其神符初子比

自晉歸韓宣子問叔向曰子比其濟乎對曰不就宣子

曰同惡相求如市賈焉

服虔曰謂國人共惡靈王者如市賈之人求利也

何為

不就對曰無與同好誰與同惡

服虔曰言無黨於內當與誰同其好惡

取

國有五難有寵無人一也

杜預曰寵須賢人而固

有人無主二也

杜預曰雖有賢人當須內主為應

有主無謀三也

杜預曰謀策謀也

有謀而無

民四也

杜預曰民衆也

有民而無德五也

杜預曰四者既備當以德成之

子比

在晉十三年矣晉楚之從不聞通者可謂無人矣

杜預曰晉

楚之士從子比游皆非達人

族盡親叛可謂無主矣

杜預曰無親族在楚

無覺

而動可謂無謀矣

服虔曰言靈王尚在而妄動取國故謂無謀

為羈終世可

謂無民矣

杜預曰終身羈客在於晉是無民

亡無愛徵可謂無德矣

杜預

曰楚人無愛念者

王虐而不忌

杜預曰靈王暴虐所畏忌將自亡

子比涉五難

以弑君誰能濟之有楚國者其棄疾乎君陳蔡方城外

屬焉苛慝不作盜賊伏隱私欲不逞

服虔曰不以私欲違民心民無

怨心先神命之國民信之芊姓有亂必季實立楚之常

也子比之官則右尹也數其貴寵則庶子也以神所命

則又遠之民無懷焉將何以立宣子曰齊桓晉文不亦

是乎

服虔曰皆庶子而出奔

對曰齊桓衛姬之子也有寵於釐公

有鮑叔牙賓須無隰朋以為輔有莒衛以為外主

賈逵曰齊

桓出奔莒自莒先入衛人助之

有高國以為內主

服虔曰高子國子皆齊之正卿

從善如流

服虔曰言其疾

施惠不倦有國不亦宜乎昔我文公狐季姬之

子也有寵於獻公好學不倦生十七年有士五人有先

大夫子餘子犯以為腹心

賈逵曰子餘趙衰

有魏犢賈佗以為

股肱有齊宋秦楚以為外主

賈逵曰齊以女妻之宋贈之馬楚享以九獻秦送內

之有樂卻狐先以為內主

賈逵曰四姓晉大夫

亡十九年守志彌

篤惠懷棄民

服虔曰皆棄民不恤

民從而與之故文公有國不亦

宜乎子比無施於民無援於外去晉晉不送歸楚楚不

迎何以有國子比果不終焉卒立者棄疾如叔向言也

平王二年使費無忌如秦

服虔曰楚大夫

為太子建娶婦婦好

來未至無忌先歸說平王曰秦女好可自娶為太子更

求平王聽之卒自娶秦女生熊珍更為太子娶是時伍

奢為太子太傅無忌為少傅無忌無寵於太子常讒惡

太子建建時年十五矣其母蔡女也無寵於王王稍益

疏外建也六年使太子建居城父守邊

服虔曰城父楚北境邑杜預曰

襄城城父縣

無忌又日夜讒太子建於王曰自無忌入秦女

太子怨亦不能無望於王王少自備焉且太子居城父

擅兵外交諸侯且欲入矣平王召其傅伍奢責之伍奢

知無忌讒乃曰王奈何以小臣疏骨肉無忌曰今不制

後悔也於是王遂囚伍奢而召其二子而告以免父死

乃令司馬奮揚召太子建欲誅之太子聞之亡奔宋無忌曰伍奢有二子不殺者為楚國患盍以免其父召之必至於是王使使謂奢能致二子則生不能將死奢曰尚至胥不至王曰何也奢曰尚之為人廉死節慈孝而仁聞召而免父必至不顧其死胥之為人智而好謀勇而矜功知來必死必不來然為楚國憂者必此子於是王使人召之曰來吾免爾父伍尚謂伍胥曰聞父免而莫奔不孝也父戮莫報無謀也度能任事智也子其行矣

我其歸死伍尚遂歸伍胥彎弓厲矢出見使者曰父有
罪何以召其子為將射使者還走遂出奔吳伍奢聞之
曰胥亡楚國危哉楚人遂殺伍奢及尚十年楚太子建
母在居巢開吳吳使公子光伐楚遂敗陳蔡取太子建
母而去楚恐城郢初吳之邊邑卑梁與楚邊邑鍾離小
童爭桑兩家交怒相攻滅卑梁人卑梁大夫怒發邑兵
攻鍾離楚王聞之怒發國兵滅卑梁吳王聞之大怒乃
發兵使公子光因建母家攻楚遂滅鍾離居巢楚乃恐

而城郢十三年平王卒將軍子常曰太子珍少且其母
乃前太子建所當娶也欲立令尹子西子西平王之庶
弟也有義子西曰國有常法更立則亂言之則致誅乃
立太子珍是為昭王昭王元年楚衆不說費無忌以其
讒亡太子建殺伍奢子父與郤宛宛之宗姓伯氏子嚭
及子胥皆奔吳吳兵數侵楚楚人怨無忌甚楚令尹子
常誅無忌以說衆衆乃喜四年吳三公子昭王十年二
公子奔楚公
子掩餘奔徐公子燭庸奔楚楚封之以扞吳五年吳伐
奔鍾離此言三公子非

取楚之六潛七年楚使子常伐吳吳大敗楚於豫章十年冬吳王闔閭伍子胥伯嚭與唐蔡俱伐楚楚大敗吳兵遂入郢辱平王之墓以伍子胥故也吳兵之來楚使子常以兵迎之夾漢水陣吳伐敗子常子常亡奔鄭楚兵走吳乘勝逐之五戰及郢己卯昭王出奔庚辰吳人入郢春秋云十一月庚辰昭王亡也至雲夢雲夢不知其王也射傷王王走鄖鄖公之弟懷曰平王殺吾父服虔曰父曼成然今我殺其子不亦可乎鄖公止之然恐其弑昭王乃與王

奔隨吳王聞昭王往即進擊隨謂隨人曰周之子孫封
於江漢之間者楚盡滅之欲殺昭王王從臣子綦乃深
匿王自以為王謂隨人曰以我予吳隨人卜予吳不吉
乃謝吳王曰昭王亡不在隨吳請入自索之隨不聽吳
亦罷去昭王之出郢也使申包胥服虔曰楚大夫王孫包胥請救於
秦秦以車五百乘救楚楚亦收餘散兵與秦擊吳十一
年六月敗吳於稷賈逵曰楚地也會吳吳王弟夫概見吳王兵
傷敗乃亡歸自立為王闔閭聞之引兵去楚歸擊夫概

夫概敗奔楚楚封之堂谿號為堂谿氏楚昭王滅唐

杜預

曰義陽安昌縣東南上唐鄉

九月歸入郢十二年吳復伐楚取番楚

恐去郢北徙都郢十六年孔子相魯二十年楚滅頓

地理

志曰汝南頓縣故頓子國

滅胡

杜預曰汝南縣西北胡城

二十一年吳王闔閭伐

越越王勾踐射傷吳王遂死吳由此怨越而不西伐楚

二十七年春吳伐陳楚昭王救之軍城父十月昭王病

於軍中有赤雲如鳥夾日而蜚

杜預曰雲在楚上唯楚見之

昭王問

周太史太史曰是害於楚王然可移於將相將相聞是

言乃請自以身禱於神昭王曰將相孤之股肱也今移禍庸去是身乎弗聽卜而河為祟大夫請禱河昭王曰自吾先王受封望不過江漢

服虔曰謂所受王命祀其國中山川為望

而河非

所獲罪也止不許孔子在陳聞是言曰楚昭王通大道矣其不失國宜哉昭王病甚乃召諸公子大夫曰孤不佞再辱楚國之師今乃得以天壽終孤之幸也讓其弟公子申為王不可又讓次弟公子結亦不可乃又讓次弟公子閭五讓乃後許為王將戰庚寅昭王卒於軍中

子閭曰王病甚舍其子讓羣臣臣所以許王以廣王意也

今君王卒臣豈敢忘君王之意乎乃與子西子綦謀伏

師閉塗

徐廣曰一作壁

迎越女之子章立之

服虔曰閉塗不通外使也越女昭王

妾之是為惠王然後罷兵歸葬昭王惠王二年子西召故

平王太子建之子勝於吳以為巢大夫號曰白公

徐廣曰伍

楚子胥傳曰使勝守楚之邊邑鄢駟案服虔曰白邑名白楚邑大夫皆稱公杜預曰汝陰褒信縣西南有白亭

公好兵而下士欲報仇六年白公請兵令尹子西伐鄭初
白公父建亡在鄭鄭殺之白公亡走吳子西復召之故

以此怨鄭欲伐之子西許而未為發兵八年晉伐鄭鄭

告急於楚楚使子西救鄭受賂而去白公勝怒乃遂與勇

力死士石乞等襲殺令尹子西子綦於朝因劫惠王置

之高府

賈逵曰高府府名也杜預曰楚別府

欲弑之惠王從者屈固負王

亡走昭王夫人宮

服虔曰昭王夫人惠王母越女也

白公自立為王月

餘會葉公來救楚楚惠王之徒與共攻白公殺之惠王

乃復位是歲也

徐廣曰惠王之十年

滅陳而縣之十三年吳王夫

差彊陵齊晉來伐楚十六年越滅吳四十二年楚滅蔡

四十四年楚滅杞與秦平是時越已滅吳而不能正江
淮北楚東侵廣地至泗上五十七年惠王卒子簡王中
立簡王元年北伐滅莒八年魏文侯韓武子趙桓子始
列為諸侯二十四年簡王卒子聲王當立聲王六年盜
殺聲王子悼王熊疑立悼王二年三晉來伐楚至乘丘
而還徐廣曰年表三年歸榆闕于鄭四年楚伐周鄭殺子陽九年伐韓
取負黍十一年三晉伐楚敗我大梁榆闕楚厚賂秦與
之平二十一年悼王卒子肅王臧立肅王四年蜀伐楚

取茲方於是楚為扞關以距之

李熊說公孫述曰東守巴郡距扞關之口十

年魏取我魯陽

地理志云南陽有魯陽縣

十一年肅王卒無子立其

弟熊良夫是為宣王宣王六年周天子賀秦獻公秦始

復彊而三晉益大魏惠王齊威王尤強三十年秦封衛

鞅於商南侵楚是年宣王卒子威王熊商立威王六年

周顯王致文武胙於秦惠王七年齊孟嘗君父田嬰欺

楚楚威王伐齊敗之於徐州

徐廣曰時楚已滅越而伐齊也齊說越令攻楚故云

齊欺而令齊必逐田嬰田嬰恐張丑偽謂楚王曰王所

以戰勝于徐州者田盼子不用也盼子者有功於國而
百姓為之用嬰子弗善而用申紀申紀者大臣不附百
姓不為用故王勝之也今王逐嬰子嬰子逐盼子必用
矣復搏其士卒以與王過必不便於王矣楚王因弗逐
也十一年威王卒子懷王熊槐立魏聞楚喪伐楚取我
陘山懷王元年張儀始相秦惠王四年秦惠王初稱王
六年楚使柱國昭陽將兵而攻魏破之於襄陵得八邑
又移兵而攻齊齊王患之

徐廣曰懷王六年昭陽移和而攻齊軍門曰和陳軫

適為秦使齊齊王曰為之奈何陳軫曰王勿憂請令罷之即往見昭陽軍中曰願聞楚國之法破軍殺將者何以貴之昭陽曰其官為上柱國封上爵執珪陳軫曰其有貴於此者乎昭陽曰令尹陳軫曰今君已為令尹矣此國冠之上臣請得譬之人有遺其舍人一卮酒者舍人相謂曰數人飲此不足以徧請遂畫地為蛇蛇先成者獨飲之一人曰吾蛇先成舉酒而起曰吾能為之足及其為之足而後成人奪之酒而飲之曰蛇固無足今

為之足是非蛇也今君相楚而攻魏破軍殺將功莫大焉冠之上不可以加矣今又移兵而攻齊攻齊勝之官爵不加於此攻之不勝身死爵奪有毀於楚此為蛇為足之說也不若引兵而去以德齊此持滿之術也昭陽曰善引兵而去燕韓君初稱王秦使張儀與楚齊魏相會盟齧桑十一年蘇秦約從山東六國共攻秦楚懷王為從長至函谷關秦出兵擊六國六國兵皆引而歸齊獨後十二年齊湣王伐敗趙魏軍秦亦伐敗韓與齊爭

長十六年秦欲伐齊而楚與齊從親秦惠王患之乃宣
言張儀免相使張儀南見楚王謂楚王曰敝邑之王所
甚說者無先大王雖儀之所甚願為門闌之廝者亦無
先大王敝邑之王所甚憎者無先齊王雖儀之所甚憎
者亦無先齊王而大王和之是以敝邑之王不得事王
而令儀亦不得為門闌之廝也王為儀閉關而絕齊今
使使者從儀西取故秦所分楚商於之地方六百里商於
之地在今順陽郡南鄉丹水二如是則齊弱矣是北弱

縣有商城在於中故謂之商於

齊西德於秦私商於以為富此一計而三利俱至也懷王大悅乃置相璽於張儀曰與置酒宣言吾復得吾商於之地羣臣皆賀而陳軫獨弔懷王曰何故陳軫對曰秦之所為重王者以王之有齊也今地未可得而齊交先絕是楚孤也夫秦又何重孤國哉必輕楚矣且先出地而後絕齊則秦計不為先絕齊而後責地則必見欺於張儀見欺於張儀則王必怨之怨之是西起秦患北絕齊交西起秦患北絕齊交則兩國之兵必至臣故弔

楚王弗聽因使一將軍西受封地張儀至秦詳醉隊車
稱病不出三月地不可得楚王曰儀以吾絕齊為尚薄
邪乃使勇士宋遺北辱齊王齊王大怒折楚符而合於
秦秦齊交合張儀乃起朝謂楚將軍曰子何不受地從
某至某廣袤六里楚將軍曰臣之所以見命者六百里
不聞六里即以歸報懷王懷王大怒興師將伐秦陳軫
又曰伐秦非計也不如因賂之一名都與之伐齊是我
亡於秦取償於齊也吾國尚可全今王已絕於齊而責

欺於秦是吾合齊秦之交而來天下之兵也國必大傷矣楚王不聽遂絕和於秦發兵西攻秦秦亦發兵擊之十七年春與秦戰丹陽秦大敗我軍斬甲士八萬虜我大將軍屈匄裨將軍逢侯卬等七十餘人遂取漢中之郡楚懷王大怒乃悉國兵復襲秦戰於藍田大敗楚軍韓魏聞楚之困乃南襲楚至於鄧楚聞乃引兵歸十八年秦使使約復與楚親分漢中之半以和楚楚王曰願得張儀不願得地張儀聞之請之楚秦王曰楚且甘心於

子奈何張儀曰臣善其左右靳尚靳尚又能得事於楚王幸姬鄭袖袖所言無不從者且儀以前使負楚以商於之約今秦楚大戰有惡臣非面自謝楚不解且大王在楚不宜敢取儀誠殺儀以便國臣之願也儀遂使楚至懷王不見因而囚張儀欲殺之儀私於靳尚靳尚為請懷王曰拘張儀秦王必怒天下見楚無秦必輕王矣又謂夫人鄭袖曰秦王甚愛張儀而王欲殺之今將以庸之地六縣賂楚以美人聘楚王以宮中善歌者為

之媵楚王重地秦女必貴而夫人必斥矣夫人不若言
而出之鄭袖卒言張儀於王而出之儀出懷王因善遇
儀儀因說楚王以叛從約而與秦合親約婚姻張儀已
去屈原使從齊來諫王曰何不誅張儀懷王悔使人追
儀弗及是歲秦惠王卒二十年齊湣王欲為從長惡楚
之與秦合乃使使遺楚王書曰寡人患楚之不察於尊
名也今秦惠王死武王立張儀走魏樗里疾公孫衍用
而楚事秦夫樗里疾善乎韓而公孫衍善乎魏楚必事

秦韓魏恐必因二人求合於秦則燕趙亦宜事秦四國
爭事秦則楚為郡縣矣王何不與寡人并力收韓魏燕
趙與為從而尊周室以案兵息民令於天下莫敢不樂
聽則王名成矣王率諸侯竝伐破秦必矣王取武關蜀
漢之地私吳越之富而擅江海之利韓魏割上黨西薄函
谷則楚之強百萬也且王欺於張儀亡地漢中兵銍藍
田天下莫不代王懷怒今乃欲先事秦願大王熟計之
楚王業已欲和於秦見齊王書猶豫不決下其議羣臣

羣臣或言和秦或言聽齊昭睢曰王雖東取地於越不足以刷恥必且取地於秦而後足以刷恥於諸侯王不如深善齊韓以重穽里疾如是則王得齊韓之重以求地矣秦破韓宜陽而韓猶復事秦者以先王墓在平陽而秦之武遂去之七十里以故尤畏秦不然秦攻三川趙攻上黨楚攻河外韓必亡楚之救韓不能使韓不亡然存韓者楚也韓已得武遂於秦以河山為塞所報德莫如楚厚臣以為其事王必疾齊之所信於韓者以韓

公子昧為齊相也韓已得武遂於秦王甚善之使之以齊韓重樗里疾疾得齊韓之重其主弗敢棄疾也今又益之以楚之重樗里子必言秦復與楚之侵地矣於是

懷王許之竟不合秦而合齊以善韓

徐廣曰懷王之二十二年秦拔宜陽

取武遂二十三年秦復歸韓武遂然則已非二十年事矣

二十四年倍齊而合秦秦

昭王初立乃厚賂於楚楚往迎婦二十五年懷王入與秦昭王盟約於黃棘秦復與楚上庸二十六年齊韓魏為楚負其從親而合於秦三國共伐楚楚使太子入質

於秦而請救秦乃遣客卿通將兵救楚三國引兵去二
十七年秦大夫有私與楚太子鬪楚太子殺之而亡歸
二十八年秦乃與齊韓魏共攻楚殺楚將唐昧取我重
邱而去二十九年秦復攻楚大破楚楚軍死者二萬殺
我將軍景缺懷王恐乃使太子為質於齊以求平三十
年秦復伐楚取八城秦昭王遺楚王書曰始寡人與王
約為弟兄盟于黃棘太子為質至驩也太子陵殺寡人
之重臣不謝而亡去寡人誠不勝怒使兵侵君王之邊

今聞君王乃令太子質於齊以求平寡人與楚接境壤
界故為婚姻所從相親久矣而今秦楚不驩則無以令
諸侯寡人願與君王會武關而相約結盟而去寡人之
願也敢以聞下執事楚懷王見秦王書患之欲往恐見
欺無往恐秦怒昭睢曰王毋行而發兵自守耳秦虎狼
不可信有并諸侯之心懷王子子蘭勸王行曰奈何絕
秦之驩心於是往會秦昭王昭王詐令一將軍伏兵武
關號為秦王楚王至則閉武關遂與西至咸陽朝章臺

如蕃臣不與亢禮楚懷王大怒悔不用昭子言秦因留
楚王要以割巫黔中之郡楚王欲盟秦欲先得地楚王
怒曰秦詐我而又彊要我以地不復許秦秦因留之楚
大臣患之乃相與謀曰吾王在秦不得還要以割地而
太子為質於齊齊秦合謀則楚無國矣乃欲立懷王子
在國者昭睢曰王與太子俱困於諸侯而今又倍王命
而立其庶子不宜乃詐赴於齊齊湣王謂其相曰不若
留太子以求楚之淮北相曰不可郢中立王是吾抱空

質而行不義於天下也或曰不然郢中立王因與其新
王市曰予我下東國吾為王殺太子不然將與三國共
立之然則東國必可得矣齊王卒用其相計而歸楚太
子太子橫至立為王是為頃襄王乃告于秦曰賴社稷
神靈國有王矣頃襄王橫元年秦要懷王不可得地楚
立王以應秦秦昭王怒發兵出武關攻楚大敗楚軍斬
首五萬取析十五城而去

徐廣曰年表云取十六城既取
析又并取左右十五城也駟案

地理志弘
農有析縣

二年楚懷王亡逃歸秦覺之遮楚道懷王恐

乃從間道走趙以求歸趙主父在代其子惠王初立行
王事恐不敢入楚王楚王欲走魏秦追至遂與秦使復
之秦懷王遂發病頃襄王三年懷王卒于秦秦歸其喪
於楚楚人皆憐之如悲親戚諸侯由是不直秦秦楚絕
六年秦使白起伐韓於伊闕大勝斬首二十四萬秦乃
遺楚王書曰楚倍秦秦且率諸侯伐楚爭一旦之命願
王之飭士卒得一樂戰楚頃襄王患之乃謀復與秦平
七年楚迎婦於秦秦楚復平十一年齊秦各自稱為帝

月餘復歸帝為王十四年楚頃襄王與秦昭王好會于
宛結和親十五年楚王與秦三晉燕共伐齊取淮北十
六年與秦昭王好會于鄢其秋復與秦王會穰十八年
楚人有好以弱弓微繳加歸鴈之上者頃襄王聞召而
問之對曰小臣之好射騏鴈羅鷩徐廣曰呂靜曰鷩野鳥也音龍小矢
之發也何足為大王道也且稱楚之大因大王之賢所
弋非直此也昔者三王以弋道德五霸以弋戰國故秦
魏燕趙者騏鴈也齊魯韓衛者青首也鄒費邾邳者羅

鷲也外其餘則不足射者見烏六雙以王何取王何不
以聖人為弓以勇士為繳時張而射之此六雙者可得
而囊載也其樂非特朝夕之樂也其獲非特鳬鴈之實
也王朝張弓而射魏之大梁之南加其右臂而徑屬之
於韓則中國之路絕而上蔡之郡壞矣還射圍之東解
魏左肘而外擊定陶則魏之東外棄而大宋方與二郡
者舉矣且魏斷二臂顛越矣膺擊郟國大梁可得而有
也王綽繳蘭臺

徐廣曰綽紫也
音爭蘭一作簡

飲馬西河定魏大梁此

一發之樂也若王之於弋誠好而不厭則出寶弓滌新

繳

徐廣曰以石傳弋繳曰磬磬音波

射噉鳥於東海還蓋長城以為防

徐廣曰噉一作獨還音宦蓋一作益益縣在樂安蓋縣在泰山濟北盧縣有長城東至海也

朝射東

莒夕發涓邱

徐廣曰在清河

夜如即墨顧據午道則長城之東

收而太山之北舉矣西結境於趙而北達於燕三國布

抵

徐廣曰音翅一音啻

則從不待約而可成也北遊目於燕之遼

東而南登望於越之會稽此再發之樂也若夫泗上十

二諸侯左縈而右拂之可一旦而盡也今秦破韓以為

長憂得列城而不敢守也伐魏而無功擊趙顧病則秦
魏之勇力屈矣楚之故地漢中析酈可得而復有也王
出寶弓磬新繳涉酈塞

徐廣曰或以為寘
今江夏一作颶

而待秦之倦

也山東河內可得而一也勞民休衆南面稱王矣故曰
秦為大鳥負海內而處東面而立左臂據趙之西南右
臂傳楚鄢郢膺擊韓魏垂頭中國處既形便勢有地
利奮翼鼓牴方三千里則秦未可得獨招而夜射也欲
以激怒襄王故對以此言襄王因召與語遂言曰夫先

王為秦所欺而客死於外怨莫大焉今以匹夫有怨尚
有報萬乘白公子胥是也今楚之地方五千里帶甲百
萬猶足以踊躍中野也而坐受困臣竊為大王弗取也
於是頃襄王遣使於諸侯復為從欲以伐秦秦聞之發
兵來伐楚楚欲與齊韓連和伐秦因欲圖周周王報使
武公徐廣曰定王之曾孫而西周惠公之子謂楚相昭子曰三國以兵割
周郊地以便輸而南器以尊楚臣以為不然夫弑共主
臣其君大國不親以衆脅寡小國不附大國不親小國

不附不可以致名實名實不足以傷民夫有圖周之聲非所以為號也昭子曰乃圖周則無之雖然周何故不可圖也對曰軍不五不攻城不十不圍夫一周為二十晉公之所知也韓嘗以二十萬之衆辱於晉之城下銳士死中士傷而晉不拔公之無百韓以圖周此天下之所知也夫怨結於兩周以塞鄒魯之心交絕於齊聲失天下其為事危矣夫危兩周以厚三川方城之外必為韓弱矣何以知其然也西周之地絕長補短不過

百里名為天下共主裂其地不足以肥國得其衆不足以勁兵雖無攻之名為弑君然而好事之君喜政之臣發號用兵未嘗不以周為終始是何也見祭器在焉欲器之至而亡弑君之亂今韓以器之在楚臣恐天下以器讎楚也臣請譬之夫虎肉臊其兵利身人猶攻之也若使澤中之麋蒙虎之皮人之攻之必萬之於虎裂楚之地足以肥國詘楚之名足以尊主今子將以欲誅殘天下之共主居三代之傳器吞三翮六翼以高世主非

貪而何周書曰欲起無先故器南則兵至矣於是楚計

輟不行十九年秦伐楚楚軍敗割上庸漢北地予秦二

十年秦將白起拔我西陵

徐廣曰屬江夏

二十一年秦將白起

遂拔我郢燒先王墓夷陵

徐廣曰年表云拔郢燒夷陵

楚襄王兵散

遂不復戰東北保於陳城二十二年秦復拔我巫黔中

郡二十三年襄王乃收東地兵得十餘萬復西取秦所拔

我江旁十五邑以為郡距秦二十七年使三萬人助三

晉伐燕復與秦平而入太子為質於秦楚使左徒侍太

子於秦三十六年頃襄王病太子亡歸秋頃襄王卒太子熊元代立是為考烈王考烈王以左徒為令尹封以

吳號春申君考烈王元年納州于秦以平

徐廣曰南郡有州陵縣

是時楚益弱六年秦圍邯鄲趙告急楚楚遣將軍景陽

救趙七年至新中秦兵去

徐廣曰年表云六年春申君救趙十年徙于鉅陽

十

二年秦昭王卒楚王使春申君弔祠於秦十六年秦莊

襄王卒秦王趙政立二十二年與諸侯共伐秦不利而

去楚東徙都壽春命曰郢二十五年考烈王卒子幽王

悍立李園殺春申君幽王三年秦魏伐楚秦相呂不韋卒九年秦滅韓十年幽王卒同母弟猶代立是為哀王哀王立二月餘哀王庶兄負芻之徒襲殺哀王而立負芻為王是歲秦虜趙王遷王負芻元年燕太子丹使荆軻刺秦王二年秦使將軍伐楚大破楚軍亡十餘城三年秦滅魏四年秦將王翦破我軍於蘄而殺將軍項燕五年秦將王翦蒙武遂破楚國虜楚王負芻滅楚名為

楚郡云

孫檢曰秦虜楚王負芻滅去楚名以楚地為秦郡

太史公曰楚靈王方會諸侯於申誅齊慶封作章華臺
求周九鼎之時志小天下及餓死于申亥之家為天下
笑操行之不得悲夫勢之於人也可不慎與棄疾以亂
立嬖淫秦女甚乎哉幾再亡國

史記集解卷四十